

雜記

一邑之乘有關係者分類別紀備載之矣余承乏四年博採永事有見之斷簡殘碑者有得之俗說迂談者特書不經缺畧有據附記卷末以俟後之廣覽者作雜記志

有唐尚書令劉和即太尉劉訓之父原籍本縣桑壁里人今子孫遷於陝之延安清澗居焉

宋龍岩有石洞人傳宋太祖避亂於此後勅建龍

岩寺有碑記

元烏龍山有閣王廟閣王墳不知始自何代故俗名閣山有碑記

以上二事舊碑兩摧蕪蝕字殘無考

明永和王墓在汾郡孝義縣西三十里圪卓村村有王墓銅駝一座上載永和王府曹吏之名人傳王名濟煥晉恭王第六子永樂元年封於汾諡昭定食邑永和故名余既拜其墓有詩吊之



烏龍山者山多栢古人稱栢爲烏龍識者因栢多而名其山也永人學不格物訛傳烏龍見於上舊志載之不敢缺畧

龍岩上有洪鐘高八尺圍一丈五尺肉六寸人傳先明時墜於地村人集數十不得動衆歸村食有一牧羊者立懸之遂坐化洞中村人知其異塑像焚獻其鐘至今懸焉

